修訂日期: 2004/10/13 發行日期: 2006/2/15

發行單位: 中華電子佛典協會 (CBETA) http://www.cbeta.org

資料底本: 大正新脩大正藏經 Vol. 14, No. 571

原始資料: 蕭鎮國大德提供,維習安大德提供之高麗藏 CD 經文, 閻學新大德輸

入❖沈介磐大德校對,北美某大德提供

No. 571

佛說婦人遇辜經

乞伏秦沙門聖堅譯

聞如是。一時佛在舍衛國祇樹給孤獨精舍。與大比丘眾千二百五十人俱。時有一 人無婦。往詣舍衛國。娶婦本國。自有兩子。大子七歲。次子孩抱。母復懷軀。欲向 在產。天竺禮俗。婦人臨月。歸父母國。時夫婦乘車載二子。當詣舍衛。中路食息并 牧牛。時有毒蛇。纏繞牛脚。牛遂離圈。其夫取牛。欲得嚴發。見牛為毒蛇所殺。蛇 復捨牛。復纏夫殺。婦遙見之。怖懼戰慄。啼哭呼天。無救護者。日遂欲冥。去道不 遠。有流河水。水碓有家居。婦迫日冥。懼為賊所劫。棄車將二子到水畔。留大子著 水邊。抱小子渡水。適到水半。狼食其子。子叫呼母。母時還顧見子。為狼所噉。驚 惶怖懼。失抱中子。隨水墮流。母益懊惱。迷惑失志頓躓水中。墮所懷子。遂便渡水 。問道行人。我家父母。為安隱不。行人答曰。昨家失火皆燒。父母悉盡無餘。又問 行人。我夫家姑妐為安隱不。行人答曰。昨有劇賊。傷害其家。姑妐皆死。無完在者 。其母聞之。愁憂怖懼。心迷意惑。不識東西。脫衣裸形。迷惑狂走。道中行人。見 大怪之。謂得邪病。鬼神所嬈乎。或謂愁憂迷惑失志。或有唾賤捨避之走。或有憐傷 愍念哀之。時佛在舍衛祇樹給孤獨精舍。時婦馳走。而往趣之。過祇樹園。爾時世尊 。大會說法。四輩弟子。諸天龍神。十方一切。皆悉聽經。諸佛之法。盲者見佛。皆 得眼目。聾者得聽。啞者能言。疾病除愈。尫劣強健。被毒不行。心亂得定。時婦見 佛。意即得定。不復愁憂。自視裸形。慚愧伏地。佛呼阿難。取衣與婦。即時受教。 則取衣與婦。著衣竟稽首佛足。却坐一面。佛即說經。為現罪福。人命無常。合會有 別。生者有死。無生不終。一切本空。自作起滅。展轉五道。譬如車輪已解本無不復 起分。婦聞佛言。心開意解。即發無上正真道意。即時得立不退轉地。愁憂除愈。如 日無雲。佛說如是。四輩歡喜。諸天龍神。稽首而退。

佛說婦人遇辜經